

## Pidato Pasambahan Manjapuik Marapulai : Pidato Sirieh

Contributed by Damrus Lukman (Paduka)  
Friday, 27 June 2008

Ujuang :  
Maa baliu, Datuak, ....

Pangka :  
Sampaikan lah Datuak, ...

Ujuang :  
Ikomah sambah nan ka dipulangkan ka bakeh Datuak, adek bajalan babuah batih, adek malenggang babuah tangan. Dek lai tasuo nan bak kian, mamintak kami ka bakeh silang nan bapangka, karajo baiek nan bapokok, naikkan janang ka tangah, mah Datuak ....

Pangka :  
Lah ukue sampai, Datuak ....

Ujuang :  
Bilang sakiro itu lah, Datuak ....

Pangka :  
Jikok baitu pintak jo pinto, pintak bulieh, kandak balaku. Namun samantang pun baitu, basaba juo Datuak samantaro, tarago janang marenjek saruang, mah Datuak ...

Ujuang :  
Basaba kami mananti, mah Datuak.....

.... janang tagak manjapuik carano dari ujuang, kemudian dilatakan di muko ninik mamak rang sipangka...

Ujuang :  
Maa baliu, Datuak, ....

Pangka :  
Sampaikan lah Datuak, ...

Ujuang :  
Ikomah sambah nan ka dipulangkan ka bakeh Datuak, pitaruah indak baunyian, pasan indak baturuti. Satantang pakiriman kami nan talayang, lah sampai kolah ka haribaan Datuak, mah Datuak ....

Pangka :  
Sabarih pakiriman Datuak nan talayang, lah mawujuik lah barupo, mah Datuak ...

Ujuang :  
Maa baliu, Datuak, ....

Pangka :  
Manitah lah Datuak, ...

Ujuang :  
Itumah sambah nan ka dipulangkan ka bakeh Datuak, sungguh pun Datuak surang nan dihadang dengan sambah, tagah dek adaik jo limbago, dek aluran datuak kasamonyo, ambo ka mandatangan sambah. Apolah ruponyo jinih pasambahan nan ka ambo pulangkan ka bakeh Datuak, dek curiang barih dahulu, dek andai pusako lamo, jikok basiang di nan tumbueh, jikok batimbang di nan ado, tumbuah sarupo iko kini. Dek lamo lupu kok datang, dek banyak ragu kok tibo, nan tinggi kok kurang anjuang, nan gadang kok kurang amba, Allah nan basipaik Qodim, manusia basipaik khilaf. rila jo maaf ambo puhunkan. Limbak nan dari pado itu, adaik kan duo salanggano, cancang nan duo salandasan.

Putiang talatak di hulu  
Di bawah kumpalan tali  
Asa mulo rundiang dahulu  
Tigo limbago nan tajadi

Partamo sambah manyambah, kaduo baso jo basi, katigo sirieh jo pinang. Sambah manyambah dalam adaik, tali batali undang undang. Tasabuik bamuluik manih, takato baso jo basi, muluik manih pangarang baso, budi baiek tali pikatan, pahubuang silaturrahi, banamo adaik sopan santun. Rajo alam di Minangkabau, pamuncak di limo puluah, iyo carano rang namokan.

Ramo-ramo tabang malayang  
 Malayok ka koto tengah  
 Banyaknyo ampek pulueh ampek  
 Endah carano bukan kapalang  
 Talatak di tengah-tengah  
 Di lingkuang urang nan rapek

Carano banamo carano basa, baukie bamego-mego, batatah bak pucuk rabuang, buatan Sariak Sungaipua. Batirai ba antiang-antiang, ba aleh kusap kain ramin, panuah barisi kalangkapan, kaganti baso jo basi. Loroang kapado siriahnyo, siriah nan kuniang merah janggi. siriah tajali tempuak udang, dimakan sahalai manih, buahnyo jarang basuo, batang diambiak ka tinaman, satahun dalam gulungan, usah ka busuak layuapun tido. Limbak kapado pinangnyo, pinang baruntuak jo baruntun. Bak dasun dibalah duo, bak bawang dibalah ampek. Batangnyo tinggi linggayuran, satahun tupai mamanej. balun lai sampai ka puncaknyo. Tingginyo jambo-jamboan, buahnyo jangkau-jangkauan, jatua ka bawah jadi ambun, banamo si Ambun Suri. Loroang kapado gambianyo, kaba barito kami danga, buatan puti sari lamak, sapipia jatua ka siriah, mambayang sampai ka muko, lamaknyo tingga di rangkungan, sarinyo naiak ka paroman, sirahnyo nampak di bibia. Sadahnyo langkitang gadang, di basuah jo aie ambun, bacampua jo pati santan, diambuih jo lingka cino, dikipeh jo ambi-ambi, putih nan bagai banak balam. Dipalik jo jari manih, bakisa ka jari tengah, mambayang ka tapak tangan. Timbakaunyo aluih bak randau batang padi, diracik nak rang Piobang. Di Ranah Luak Limo Puluah, bapantang masiek di paneh, masiak satangkai aie bungo.

Ramo-ramo di tengah koto  
 Lipek batindieh bungo nango  
 Pitalah rami lah pakan  
 Patah subang patahlah saluik  
 Datuak sarato nan bak tuo di siko  
 Liek lah sirieh dalam carano  
 Dayang panginang mahasiekkan  
 Antah nyo kurang antah lai cukuik

Pitua jua ambo ka dibari barang sapatah, mah Datuak ....

Pangka :  
 Bana pulo tumah sapanjang panitahan Datuak nan ka tengah,

Rajo indaruang nak ka bayang  
 Nak lalu ka indropuro  
 Kudo balang kaniangnyo putih  
 Tapawik cando di halaman  
 Langkok kakang jo palanonyo

Satatang pangiriman dayang panginang  
 Lah ambo liek dalam carano  
 Sirieh kuniang pinangnyo putih  
 Gambie nan elok kapamenan  
 Sadonyo lah cukuik asie balako, mah Datuak .....

Ujuang :  
 Lah ukue sampai Datuak .....

Pangka :  
 Bilang sakiro itu lah Datuak ....

Ujuang :  
 Dang dikatokan lah cukuik asie balako, disinan kan takana pulo ambo dek pitua urang tuo kito, apolah nan manjadi pitua dek urang tuo kito

Ayam putih tabang batali  
 Di lurah mangko marawok  
 Batalue di rumpun sariek

Anaknyo turun salapan

Makan lah sirieh pinang kami  
Bapitua mangko basingkok  
Baibarek mangko dicabiek  
Batangnyo ambiek ka tinaman

Tanam sirieh tanam lah pinang  
Tanam karakok di halaman  
Makan sirieh gatok lah pinang  
Baitu pitua sapangkalan,

mak Datuak .....

Pangka :  
Lah ukue sampai, Datuak....

Ujuang :  
Bilang sakiro itulah, Datuak....

Pangka :  
Bana pulo tumah panitahan tuan nan ka tengah, jikok didanga lah elok bunyi, jikok dipandang lah rancak rupo.  
Satantang pintak jo pinto Datuak tadi, pintak buliah kandak balaku.

Gadang lah aie muaropaneh  
Bapenong lalu ka muaro  
Ka pakan mambali sadah  
Dibawo anak urang kampuang Dilam

Lah mandanguang carano ameh  
Lah mandancıang palapah nan pusako  
Galak tasengeang kapuran sadah  
Tandonyo siriah lah kami makan

Alah kasanang hati Datuak, mah Datuak .....

Ujuang :  
Iyo lah baiek manyanang hati kami, mah Datuak....

Bersambung ...

Note :  
Pidato pasambahan Manjapuik marapulai, disusun oleh kawan-kawan di "Kacimpuang pamenan Mandi" di bawah arahan Halvi Hamid Mangkoto Sati, yang anggotanyo terdiri dari anak Nagari Muaropaneh Kabupaten Solok nan ado di Jakarta dan sekitarnya.

Naskah ini telah beberapa kali dikaoan (dipraktekkan) dalam acara manjapuik marapulai manjalang baralek di gedung atau di aula. Diharapkan naskah ini dapat membantu memberikan arah dalam acara pidato pasambahan.

Semoga bermanfaat.